



مجلس بندياري قتاليج جايا

MAJLIS BANDARAYA PETALING JAYA

Jalan Yong Shook Lin, 46675 Petaling Jaya, Selangor Darul Ehsan.

Tel : 603 - 7956 3544 Faks : 603 - 7958 1494

Hotline MBPJ : 603 - 7954 2020 E-mel : aduan@mbpj.gov.my Laman web : www.mbpj.gov.my

KENYATAAN AKHBAR

BIL : Ruj. Kami: MBPJ.UKK.100-9/1/7 (57)

Tarikh: 26 Julai 2025

SAMBUTAN HARI ORGANIK PERINGKAT MBPJ 2025 SEMARAKKAN KESEDARAN ALAM SEKITAR PETALING JAYA

Majlis Bandaraya Petaling Jaya (MBPJ) terus memperkukuh komitmennya terhadap pembangunan mampan dan kelestarian alam sekitar menerusi penganjuran Sambutan Hari Organik Peringkat MBPJ 2025 yang telah berlangsung di Gelanggang Bola Keranjang SS2, Petaling Jaya hari ini.

Program anjuran Jabatan Pengurusan Sisa Pepejal dan Pembersihan Awam MBPJ dengan kerjasama Centre for Environment, Technology and Development, Malaysia (CETDEM) ini menghimpunkan pelbagai komuniti bandar, pengusaha organik serta pencinta alam bagi meraikan gaya hidup hijau dan mesra alam.

Majlis perasmian telah disempurnakan oleh YBrs. Tuan Mohd Fauzi bin Maarop, Timbalan Setiausaha (Pengurusan) MBPJ. Dalam ucapannya, beliau menekankan kepentingan penganjuran program seumpama ini dalam memperkukuh kesedaran masyarakat bandar terhadap impak gaya hidup moden dan pilihan makanan ke atas kesihatan serta persekitaran.

Apa yang menjadikan sambutan kali ini unik dan lebih inklusif adalah kepelbagaian aktiviti serta pengisian yang ditawarkan untuk seisi keluarga. Pengunjung berpeluang mendapatkan pelbagai hasil tani segar dari kawasan tanah tinggi dan rendah di ruang pameran termasuk sayur-sayuran berdaun, kekacang, tanaman ubi serta buah-buahan. Lebih istimewa, turut ditawarkan jualan durian hutan, buah tempatan yang jarang ditemui di pasaran biasa dan pastinya mencuri tumpuan para pencinta durian.

Selain itu, terdapat juga barangan keperluan harian berasaskan organik seperti beras, mi, bijirin, benih tanaman serta produk penjagaan tanah dan baja kompos daripada najis lembu. Tidak ketinggalan, pelbagai produk kesihatan dan kebersihan rumah bebas toksik, barangan penjagaan diri, pakaian kapas tanpa peluntur dan hasil kraf tangan buatan tangan komuniti Orang Asli dan aktivis kitar semula turut ditawarkan.

Segmen makanan dan minuman juga mendapat sambutan luar biasa, menampilkan pelbagai sajian fusion seperti mi keladi, nasi keladi, salad, jem, ulam-ulaman serta minuman menyegarkan seperti teh kombucha, jus *Beetroot* dan barli hijau.

Bagi mereka yang ingin menimba ilmu dan kemahiran baharu, terdapat pelbagai sesi ceramah dan demonstrasi yang berlangsung sepanjang hari antaranya ceramah mengenai sistem tanaman jimat air di rumah, pengurusan perosak secara semula jadi, pemahaman tentang khasiat madu gua serta rawatan holistik penyakit ekzema.



www.mbpj.gov.my



Majlis Bandaraya Petaling Jaya



[pjcitycouncil](https://twitter.com/pjcitycouncil)

Malah, satu sesi dialog terbuka turut dianjurkan melibatkan petani, pengguna, NGO dan agensi terlibat yang membincangkan cabaran pertanian organik di Malaysia dan kelangsungan hidup petani tempatan.

Pengunjung juga berpeluang melawat Smart PJ Waste Solution Lab, menyaksikan sendiri proses pengkomposan sisa makanan secara langsung serta menerima baja cecair kompos secara percuma bagi pengunjung yang membawa botol kosong sendiri berkapasiti maksimum dua liter.

Bagi menceriakan lagi sambutan, MBPJ turut menawarkan pemberian anak pokok percuma kepada 50 pengunjung terawal sebagai simbolik komitmen menanam kesedaran hijau dalam diri setiap warga bandar raya.

Sambutan Hari Organik ini bukan sekadar medan jualan produk organik tetapi merupakan platform pendidikan masyarakat untuk memahami kesan pilihan harian terhadap ekosistem. Ia selari dengan aspirasi MBPJ dalam menjadikan Petaling Jaya sebagai sebuah bandar raya rendah karbon, rendah sisa dan berdaya tahan menjelang 2030.

Menerusi sambutan hangat daripada pelbagai lapisan masyarakat, program ini terbukti berjaya menyatukan warga Petaling Jaya dalam satu matlamat iaitu memperkasakan gaya hidup sihat, mesra alam dan mampan.

Dikeluarkan oleh:

Sekretariat Media
Unit Komunikasi Korporat,
Majlis Bandaraya Petaling Jaya.

Laman web: www.mbpj.gov.my, facebook: Majlis Bandaraya Petaling Jaya, twitter: [pjcitycouncil](https://twitter.com/pjcitycouncil),
emel: media@mbpj.gov.my Tel : 03-79563544 sambungan 203/204, Faks : 03-79582695



مجلس بندياري قتالينج جايا
MAJLIS BANDARAYA PETALING JAYA

Jalan Yong Shook Lin, 46675 Petaling Jaya, Selangor Darul Ehsan.

Tel : 603 - 7956 3544 Faks : 603 - 7958 1494

Hotline MBPJ : 603 - 7954 2020 E-mel : aduan@mbpj.gov.my Laman web : www.mbpj.gov.my

KENYATAAN AKHBAR

BIL : Ruj. Kami: MBPJ.UKK.100-9/1/7 (58)

Tarikh: 27 Julai 2025

PJ INTERNATIONAL OUTDOOR EXPO 2025 TAMPIL LEBIH DINAMIK, ANJUR KATEGORI ANUGERAH BAHARU DAN PERKUKUH PEMBELAJARAN LUAR

Majlis Penutup *PJ International Outdoor Expo 2025* berlangsung meriah hari ini di Kompleks Sukan, Kelana Jaya. Majlis telah disempurnakan oleh YBr. Tuan Hj. Mohamad Zahri bin Hj. Samingon, Datuk Bandar Petaling Jaya.

Memasuki edisi keempat, ekspo tahunan ini terus mencuri perhatian pencinta aktiviti luar dengan penyertaan antarabangsa yang lebih meluas melibatkan peserta dari **Malaysia, Jepun, China, Pakistan, Indonesia** dan beberapa negara lain.

Datuk Bandar dalam ucapannya menzahirkan penghargaan kepada semua pihak yang telah menjayakan acara ini dan menegaskan bahawa Majlis Bandaraya Petaling Jaya (MBPJ) amat berbangga menjadi rakan strategik utama yang komited dalam menjayakan penganjuran ekspo setiap tahun.

Mengangkat tema **#MalaysiaLuarBiasa**, ekspo kali ini meraikan kecekalan, kejayaan dan semangat luar biasa rakyat Malaysia dan komuniti global dalam dunia eksplorasi dan kecergasan.

Beberapa ikon terkenal turut hadir memeriahkan acara antaranya En. Soh Wai Ching, juara dunia acara larian menara yang juga merupakan Duta Rasmi Majlis, En. Zahariz Khuzaimah, En. Ekaputra Jabar dan Pn. Nadiah Aziz, pengembara dunia berbasikal, En. Ravichandran Tharumalingam, pendaki Gunung Everest serta En. Khafiz Al Kicok, pendaki Gunung K2.

“Kita bukan sahaja meraikan pencapaian mereka, malah menjadikan pengalaman mereka sebagai sumber inspirasi dan ilmu yang mampu membentuk generasi lebih lasak, sihat dan berdaya tahan,” ujar Datuk Bandar.

Edisi kali ini turut memperkenalkan **pendekatan baharu melalui elemen pembelajaran luar**, yang merangkumi **sesi perkongsian ilmu berkaitan rekreasi, keselamatan, serta persediaan fizikal dan mental**. Inisiatif ini seiring dengan aspirasi MBPJ dalam memperkasakan gaya hidup sihat, aktif dan celik alam dalam kalangan warga bandar raya.

Satu lagi kelainan utama tahun ini ialah penambahan **satu (1) kategori baharu dalam Anugerah Outdoor Expo Malaysia (OXM) 2025**, menjadikan keseluruhan **empat (4) kategori anugerah** seperti berikut :-



www.mbpj.gov.my



Majlis Bandaraya Petaling Jaya



[pjcitycouncil](https://www.facebook.com/pjcitycouncil)

- i. Green Award*
- ii. Safety Award*
- iii. Best Deco Award*
- iv. Innovation Award (kategori baharu)*

Penilaian anugerah ini dibuat berdasarkan **impak sosial, kesan terhadap alam sekitar serta sumbangan terhadap pembangunan industri aktiviti luar**. Ini mencerminkan komitmen penganjur untuk mewujudkan ekosistem *outdoor* yang mampan, inklusif dan progresif.

MBPJ kekal komited menyokong penganjuran program yang membawa nilai kesihatan, perpaduan dan kesedaran alam sekitar kepada warga bandar raya. Majlis turut merakamkan setinggi-tinggi penghargaan kepada pihak penganjur dan semua peserta yang telah menjayakan ekspo tahun ini.

PJ International Outdoor Expo 2025 bukan sekadar pameran, sebaliknya merupakan platform pembelajaran, inspirasi dan penglibatan komuniti. Sepanjang tiga (3) hari penganjuran yang bermula dari 25 hingga 27 Julai 2025, pelbagai aktiviti interaktif dan berimpak tinggi telah ditawarkan kepada pengunjung sekali gus menjadikan ekspo ini satu medan terbaik dalam membudayakan gaya hidup aktif dan lestari dalam kalangan masyarakat bandar.

Dikeluarkan oleh:

Sekretariat Media
Unit Komunikasi Korporat,
Majlis Bandaraya Petaling Jaya.

Laman web: www.mbpj.gov.my, facebook: Majlis Bandaraya Petaling Jaya, twitter: [pjcitycouncil](https://twitter.com/pjcitycouncil),
emel: media@mbpj.gov.my Tel : 03-79563544 sambungan 203/204, Faks : 03-79582695



مجلس بندياري قتاليج جايا

MAJLIS BANDARAYA PETALING JAYA

Jalan Yong Shook Lin, 46675 Petaling Jaya, Selangor Darul Ehsan.

Tel : 603 - 7956 3544 Faks : 603 - 7958 1494

Hotline MBPJ : 603 - 7954 2020 E-mel : aduan@mbpj.gov.my Laman web : www.mbpj.gov.my

KENYATAAN AKHBAR

BIL : Ruj. Kami: MBPJ.UKK.100-9/1/7 (59)

Tarikh: 30 Julai 2025

MBPJ CUNGKIL BAKAT BAHARU DAN PERKASA PERPADUAN MENERUSI PENGANJURAN KEJOHANAN BADMINTON BERPASUKAN PIALA DATUK BANDAR PETALING JAYA 2025

Majlis Bandaraya Petaling Jaya (MBPJ) dengan kerjasama Malaysian Indian Badminton Association (MIBA) bakal menganjurkan Kejohanan Badminton Berpasukan Piala Datuk Bandar Petaling Jaya 2025 yang dijadualkan berlangsung dari 29 hingga 31 Ogos 2025 di Gelanggang Badminton, Dewan D' Klana, Jalan Stadium SS7/15, Petaling Jaya.

Kejohanan ini dijangka menghimpunkan seramai 192 pemain muda dan amatir dari seluruh negara melalui penyertaan maksimum 32 pasukan. Setakat ini, sebanyak 12 pasukan telah mengesahkan penyertaan dengan yuran ditetapkan sebanyak RM300 setiap pasukan.

Penganjuran kejohanan ini membawa aspirasi besar dalam memperkasa pembangunan sukan badminton tempatan, khususnya di peringkat akar umbi. Ia berperanan sebagai platform strategik untuk mencungkil, membentuk dan menyetengahkan bakat-bakat baharu yang berpotensi mewakili Petaling Jaya, Selangor, dan seterusnya negara dalam kejohanan berprestij. Pada masa yang sama, kejohanan ini turut menjadi medium penyatuan masyarakat pelbagai kaum, menyemarakkan semangat perpaduan dan keharmonian nasional seiring dengan sambutan bulan kemerdekaan ke-68 tahun ini.

Selain itu, kejohanan ini memberi peluang kepada para peserta merasai pengalaman bersaing dalam suasana pertandingan yang lebih profesional dan berprestij, menepati standard kejohanan antarabangsa. Dengan penggunaan sistem kiraan mata terkini dan liputan kejohanan secara langsung, ia pastinya memberikan dimensi baharu kepada penganjuran sukan di peringkat komuniti.

Kejohanan ini menawarkan sebanyak lima (5) kategori seperti berikut:-

- i. Bawah 10 Tahun – Perseorangan Perempuan
- ii. Bawah 10 Tahun – Perseorangan Lelaki
- iii. Bawah 13 Tahun – Perseorangan Perempuan



- iv. **Bawah 15 tahun – Perseorangan Lelaki**
- v. **Beregu Lelaki (Amatur)**

Hadiah keseluruhan berjumlah **RM5,500** menanti para pemenang selain medal dan cenderahati. Pasukan **Johan akan menerima RM2,500, Naib Johan RM1,500**, manakala **tempat ketiga** bersama masing-masing akan menerima hadiah wang tunai **RM750**.

Kejohanan ini turut menerima tajaan daripada beberapa syarikat korporat dan badan sukan yang menyokong penuh inisiatif pembangunan badminton tempatan. Antara rakan penaja termasuk **Absolute Protech Sports (M) Sdn. Bhd.** yang diterajui oleh YBhg. Datuk Ronnie Chong, **RAK, Selangor Badminton Association (SBA)** dan **Club ZEAL SPORT**. Sumbangan penaja merangkumi barangan dan peralatan kejohanan serta sokongan teknikal siaran langsung sepanjang kejohanan berlangsung.

MBPJ yakin bahawa kejohanan ini bukan sahaja memperkukuh peranan badminton sebagai sukan teras negara malah berupaya melahirkan generasi muda yang sihat, berdaya tahan, berdisiplin serta menjunjung semangat perpaduan dan kesukanan.

Kejohanan ini dijangka menarik perhatian masyarakat setempat dan memberi inspirasi lebih ramai belia untuk aktif dalam dunia sukan sekali gus menyumbang kepada pembangunan komuniti sukan yang inklusif dan kompetitif.

Penyertaan masih dibuka dan pihak penganjur mengalu-alukan penyertaan pasukan baharu sebelum **tarikh tutup pada 12 Ogos 2025**. Jangan lepaskan peluang untuk menjadi sebahagian daripada kejohanan berprestij ini yang bukan sahaja menjanjikan saingan sengit malah pengalaman berharga dalam suasana pertandingan bertaraf profesional.

Dikeluarkan oleh:

**Sekretariat Media
Unit Komunikasi Korporat,
Majlis Bandaraya Petaling Jaya.**

Laman web: www.mbpj.gov.my, facebook: Majlis Bandaraya Petaling Jaya, twitter: [pjcitycouncil](https://twitter.com/pjcitycouncil),
emel: media@mbpj.gov.my Tel : 03-79563544 sambungan 203/204, Faks : 03-79582695